

舜水遺書

一
函
十二冊

舜水文集卷十二

明餘姚朱之瑜撰

啓

與源光國啓

伏以啓宇於東正青社之攸寄建中爲極奠赤子於咸寧雖繼世以守其成實創業而垂其統愚民誠難與慮始識者先知其克終忭舞情深揄揚莫罄恭惟上公閣下文事武備學優行成仁義裕於天常孝弟誠堪世則爲子爲弟爲叔父貴無匹於當今敬賢敬德敬多聞法可傳於來禩慈惠之聲日遍宇下憂勤之志夕惕胸中茲適孝思之有終正當訪落之伊始萬民已安於衽席一心若納諸溝中非爲號令之一新改其舊政但使整齊其已甚濟此徽猷欲臻美大之觀聿新庠序之教成德有造壽考莫踰於西伯制禮作樂達孝欲協於周公誠得絃歌徧於一國矧看仁政被於八紘蒞屋無豐人民胥慶華封多祝奕業其昌伏願好善好士興讓興仁舍己以從人居尊而忘勢法嗚噫而爲照無一人不欽其明矢金石以

爲盟非他道可渝其志繼舊邦而作新民與斯人而入聖域之瑜臨啓可勝歡欣
踴躍之至

與源光國

之瑜頓首頓首淫雨爲災恒寒降沴敗已成之禾稼生無窮之隱虞憂在君心覃
及卿士宜思變咎之故深圖消弭之方問民疾苦弔其災傷固曰今時之急務雖
有凶荒邦無捐瘠必咨他日之遠猷之瑜悲閔填胸情辭莫達君上璣衡在手運
掌無難伏冀推此微誠臻於至理悟已往之不諫念將來之可追苟晴霽之有期
卽車驅之夙戒瞻顏在近披素非遙臨啓可勝皇皇戰慄之至

與源光國

本月二十八日承賜土筆壹管者伏惟天有文士有筆遂生天地之文章媿之瑜
誦其詩讀其書多昧詩篇之草木樹夷齊之堂清均薇蕨錫韓侯之命旨類筍蒲
物其多矣維其時矣中心藏之何日忘之祇此聊叙謝悰未足敷宣德意

與源光國

本月十五日承命使臣問疾兼賜楊梅壹籠者視疾辨乎朝暮知君子無所不用其心體恤極于纖毫顧軀生有志難稱其報又且錫之果核共詫希奇赤玉盈盤色映含桃而較勝火齊甫嚼液饒脂李而尤甘豈獨是德祖家珍彷彿見故園風味沁脾滋血療疾爲丹感激恐惶先此陳謝

與源光國

本月十一日儒臣野傳自南山奉命賜以鳳凰帳一頂豕肉一肩鹿腿一肘且諭以嚴寒保護之意者之瑜體癡而識未達志大而言不文飲啄欲異夫羣鷄鏹翮無殊於凡鳥每念牛衣之臥猥懸鳳帳而棲守成無藉於籌帷忠愛迴殊乎入幕羽儀可待行將叶夢於明王德音莫違快覩覽輝於上國大爲覆幬固知峭刻矜臆無因而侵冒深藉幘幘特患浸潤膚受玩忽於卑微敢不體保護之深衷然莫改疎虞而率性況復佐之以生彘之肩重之以牲鹿之足拜嘉重複曷旣披宣臨啓可勝踴躍歡抃之至

與源光國

本月初九日微聞小恙卽遣使臣致問順攜百卉詢名拜賜天鵝一隻者伏以幾務不必殷繁綢繆當先桑土軍國雅無缺漏睿思恒及細微暑扇之不揮日旰而忘食惕厲不遑憂勤無逸大庖錫夫精膳良醢繼以醇醪之紀之綱有攸暨之卿士識大識小無夙退之大夫念茲蒲柳之姿蚤頌居息之令職勞職逸既非輔弼之風坐論作行豈協公孤之義禮甚優而罔極朝未罷而先歸乃復厘使者之車將申重一體之語自揆厥衷何以爲報恥小言而膺大祿執瓦釜以薦奇珍之瑜起舞不辨商羊貫矢奚知陳隼菽麥不分何異曾參之種米馳驅多失居然孫叔之乘軒乃希化被草木不恥詢于芻蕘豈爲人君矜博雅之名將使天下無棄遺之物植之階除則天地爲咸若之生收之藥籠是苑囿有留香之草伏願攬乾綱而獨斷綏愚民於樂成儻閭閻之疾苦纖悉必聞則堯舜之雍熙旦暮可遇謹遵成命未敢躬趨肅具謝辭藉爲上復臨啓可勝歡欣感激之至須至啓者

與源光國

恭惟沼囿乃觀遊所時有與民偕樂則爲靈燕會亦慈惠之恒情奉三無私而稱

勝詠物華乎天寶翫美景于良辰茲蓋伏遇水戶侯宰相上公閣下恩均化育德
洽陽春興發遍於域中黎庶忘阻饑之厄補助周乎四境蒼生賴回天之功於是
乘時行樂陟卷阿而矢伴奭之音遂欲一視同仁烝吉士以繼優游之闕瑜誠無
似眷顧尤深屈公侯之尊以隆寒士處理道之最而啓後人縱觀名園流連勝境
瓊花夾道鬪瑤英而霏玉屑琪樹成林綻黃金以儼螭璣濟楚肆筵貫魚銜命池
凝碧落披載籍于東方酒滴葡萄來醪醴於西域事事咸留清思一一盡發淵衷
身進食飲者三人千古僅聞周公之美躬親饋醕者數矣一介敢矜桓子之蒙在
之瑜深慚叨濫以非宜聞上公方責有司之失序況值王朝聘問之日適當勅使
旅見之時百執已夙戒於階墀主君宜寅清而晉接大抵意必移於尊重而乃神
專屬於卑微在昔方策夸談雅意疑多溢美於今躬逢盛典始知未盡鋪張勒之
丹衷佩殉白骨藏諸篋笥留貽子孫猶祈宣附史官昭明奕世尙當播揚輿誦作
則遐方但恐禮儀率度如椽之筆莫旣形容誠懇誕將載道之碑難傳萬一伏願
兼備七經篤行一德三事允治六府咸修九功之叙皆可歌與衆之樂斯無盡矣

臨啓可勝歡忭踴躍之至

與源光國

本月初九日承命近臣藤井德昭資賜天鵝一隻豕脂一壘且承後命謂勿登朝面謝者佳惠頻繁種種非民間之有隆恩鄭重事事皆近古所無膏澤足潤衰朽之軀溫言實飽大人之德欲達中心感刻無如下筆貧慳謹遣門人弘濟代爲申謝伏祈鑒炤不宣

與源光國

十五日承命儒臣生順資賜天鵝一隻者垂天若雲撲地疑雪鵠立而鶴裳失素騫騰則鴈陣驚寒鼎烹寒峻之庖羣詫屠門之嚼先此佈聞尙容崱謝

與源光國

本月十四日承命儒臣生順資賜白梅一壺者顧名思義深自媿於鹽梅遡流尋源獨何辭於鼎鼐不平不戒自知非和羹之才日居月諸何時觀調燭之盛祇此申謝不備不恭

與源光國

本月十四日荷蒙寵召觀翫芳蓮特烝髦士共爲清賞猛雨摧殘之後端然娟潔之姿嬌爾一笑佳處政不在多治比有隣會心應自不遠春容表裏自使人欽淨拭無塵夫誰不愛和旨飴芬使命頻蕃而迭錫燕樂溫克隆恩淪浹於漣漪攸介攸宜卜晝卜夜中通外直久承君子之風飽德醉酒遂偃小人之草欲趨耑頌嘉客充庭託楮代陳敷宣莫旣可勝媿謝之至

與源光國

恭遇宰相上公閣下奉先思孝追遠致誠作則允先乎友邦軌範行幾於黎獻式極迷俗不變頽風率循承聖之謨聊明用夏之禮茲當倏然見位之良時敬脩寤寐思服之精意之瑜適罹夫疾首不能躬親以執肝薄具瓣香參上明燭貳樹伏祈鑒納庶薦几筵外將齋蔬一箱佐斯陳饋八簋無限瞻依統希亮察臨啓可勝翹企之至

與源光國

本月二十二日承命使臣賚賜建蘭一尊西瓜甜瓜二盤者伏惟綿綿瓜瓞諗周德之靈長亶亶溫綸識姬圖之昌熾念之瑜蓬蒿微質錫茲大國之香瞻對芳姿詠彼猗蘭之操肅此申謝統容而陳

與源光國

本月十四日承命使臣賚賜親製嘉穀一櫬香水梨參十枚者伏以賚錫上方一時矜爲盛典燔炮躬造奕世著爲奇談然或道德足以同風庶幾承之無媿萬一主臣不能咸有必至咀而抱慚之瑜補袞非材折襪無用檄非諭蜀書豈嚇蠻不稼不穡誠多負於素餐至再至三詎克夫曠典文園香水妙解相如之渴君庖御手親調太白之羹正席先嘗雋而益永極噉致飽果爾難消伏願仁能及物敬而日隣學緝熙於光明澤溥被於民庶則聖王之政再見於今有道之長永垂於後矣臨啓歡欣忭舞之至須至啓者

與源光國

雨雪浮浮淖泥沒脛合圍不易從獸維艱靜攝行營羣情之所安忍宰相源公馬

驚車驅有限之日不耐從容談燕也昨朝幸已晴霽悠悠展旆或不至過於岑寂耳謹遣今井弘濟代候轅門薄薄江珧柱拾枚少將芹曝惟冀莞納可勝榮荷臨啓無限瞻望之至

與源光國

朔日伏承明諭謂狩期准在初三聞命卽行此時匆遽爲甚不須更辭竊已遵諭自安嗣是五六日矣每日晴明元爽幾似融和之氣歡情與時交暢遙想可見特恐霜蹄獸跡亦易越軼奔騰未免馳逐爲勞耳初六日聞世子發疹昨日入朝奉候但見大小臣工莫不歡欣悅豫已知疹候必佳及聞飲食起居事事輕快誠爲深喜或不分于田之思也謹遣今井弘濟伏謁龍旂聊代執父前驅之後外具江瑤柱拾枚少申芹曝惟冀晒留曷任榮荷臨啟可勝瞻望之至

與源光國

二十日旌節蒞鎮連日澍雨誠恐百官人從過於勞勛二十四日側聞起居悅豫可勝欣藉祇此修候安否伏惟萬福本月二十九日爲先君威公七週忌辰遵命

宿留不得駿奔清廟謹具奇楠參辦白燭貳樹聊表微忱惟祈鑒達前所面懇王儀者已於六月十八日到港其人雖非親族而意氣綢繆過於所親十載已來情義不爲衰減每年漸加敬謹可見讀書氣味大異賈人其人來此則某偶罹病患必能扶持平日拮据必能分勞某久客孤貧深德儀與其友林氏違求親故不若近取諸此敢希特諭執政詳議裁奪致書御奉行爲感儀之昆季盡沒波濤王氏宗祧獨存此子是亦仁人之所惻然也若蒙鼎力特賜留位則雀躍脚結必不後於他人矣又數日之後別有事體敷陳惟冀留神省察重加詳慎庶幾明德馨香至治協和而聳瞽不驚廻適不議至懇至懇臨啟可勝瞻祈悚息之至

與源光國告老

伏以內則著引年之禮春秋垂請老之文蓋使有志者委義命以安時薄植者循典例而恬退之瑜感懷知遇欲圖報以無窮奈夫景逼桑榆貴自量而知止況乎龍鍾搖漾恒虞顛仆以騰譁卽今杞柳凋零竊笑梧楸而自詫坐糜大官之廩餼究無小補之功能守先王待後學撫躬揆聖以增羞過者化存者神履地戴天而

媿知孝弟忠信豈吾道之非與安富尊榮俟河清而奚日茲者犬馬之齒登已七十漏欲盡而鐘欲鳴筋骨之力日就衰頽心愈長而髮愈短而且寒暑兩風時時慰諭耄勤疾事事矜憐極知優容之過身尙逸於歸休自揣閑散之尤任何官而致事但禮義之關無容踰越廉恥攸係不敢因循爲此披瀝敷宣伏望鑒茹兪允

謝源光國賀七十算

伏以興邦之大道非一而其要止在於尊賢明君之至理多端而所重莫先乎養老故惟夏后殷周之盛始著虞庠膠序之儀自非其人何敢叨濫茲蓋伏遇宰相上公閣下天挺人豪敏求好古仁義禮智道咸粹於厥躬弟友子臣德自敦夫庸行允文允武亶聰亶明誕生乎龍章韶樂之地篤行夫詩書名教之文卓爾獨知不藉乎離奇蟠木之先容毅然特立遑惜夫父兄百官之不足庭翔烏雀詠神道於安平臺築黃金啟哲人於燕路至於飲食起居盡關淵思而且疾痛災害深切隱憂伏念之瑜異邦樗朽儒林贅疣寸寸韞材曾何資藉於補袞糾糾葛屨奚能

步武于承筐僅效晉平之好學難希五穀之適秦內舉外舉雅願慕夫祁奚戲彩
弄雛心傷悲乎萊子比擬耆英往聖能無形穢神驚幼安明哲保身潞公華夷欽
仰或爲王者之師或奏旂常之績其最下者學貫天人方之之瑜品殊霄壤負茲
蓬矢之志深辜棘心之吹而乃賜之杖授之几膺殊禮以冒高賢醬而餽爵而醕
歸西伯而稱大老文武周公而下邈矣其風后王烈辟之尊孰聞斯義元王知其
意而未必備其禮明帝循其度而未必竭其誠求其情意交孚節文如貫洵矣華
夏罕儔古今希邁豈惟冠友邦之冕直欲開編錄之宗展也大成允矣君子伏願
擴而充之怙冒必先四者引申勿替殷陳普及三農興賢立教夙於變於黎民崇
德遴才廣明揚於白屋佇見含哺擊壤祝效華封自當勒石銘金名垂萬古矣臨
啟可勝悚惶祈望之至

壽中山風軒八十

恭惟老先生臺下巖邦柱礎方岳干城相弱弟而封晉名著衰毛匡烈辟以尊周
功疇仲父有言有德啟心沃心方倚毗於文明之后遽優游乎綠野之堂雖諮善

諮親操几杖以謀詢而大猷大法屬綱紀於後昆付託得人競羨祁奚之內舉規
隨不失莫煩弘景於山中生傾慕素殷樞趨獨後懷名漫滅四年始達於閭人促
席留連一見遂親夫舊識中原樸櫟豈期朽木可彫環海漂流敢曰片長之足錄
辛爾謬收於濬哲因緣執贄夫明庭挹汪度而浴滄溟仰峻儀而登疊巘意專矜
式乎高深不謂盛修夫賓主嘉禮成而訓誡少惜別易而繼見難違遠已歷三年
懷思終睽兩地恭䟽短楮薄展候私黃髮鮐背尙冀加餐以爲熙世之祥賴尾流
離亦將強飯而觀人文之化外附微儀參種無能特達寸忱用羞蘊藻之誠聊佐
瀧澣之滑統祈鑒納曷旣敷宣

壽中山道軒五十

恭惟老先生臺下禮樂中和人倫上瑞頤養稟天之道靜安法地之宜辰告遠猷
處泉石而心廊廟遊賢罷相羨宣公而迹鄴侯伴奐爾游熾昌如式天將錫百年
以優大老今特介眉壽而示先聲綺筵集郭令之顯官家慶森寶郎之丹桂屋臨
東海川潮汐以添籌園繞南山阜岡陵而獻祝僕異鄉孤掌僻地駢拇吹壘自不

成音鼓瑟豈能諸俗幸際熙明之宇濫續紹靈之裘內慚品猥才疎莫繪風清月朗惟願敬承多益保合太和馴致無疆之福允徵有道之長臨啓可勝歡忭之至

謝木下貞幹

弟生不辰逢天憚怒中原淪陷纍纍幾同喪家薄海流離栖栖竟無寧宇出沒波濤險惡之域自分僞軀必葬魚腸亢禮彫題椎結之庭逆知勁骨決遭毒手長懷輾轉無計圖維深荷貴邦容納之宏仁不吝增太倉之稊米欲報水戶君尊崇之大德妄希足岱嶽以輕塵奈何道不逢原競託師傳於誰氏行非出類敢云雨化以何人幸遇台臺文苑之宗人倫之冠博綜夫典謨子史研窮乎孔孟程朱逝矣聞名於西土晚哉相見於東都身體力行無須拾格致之餘藩意誠心正自能祛理氣之膚言外脩抑抑之威儀內蘊淵淵之學術胸羅燁燁之文采自成表表之詞章實而若虛謙不自滿遑憚蒹葭映至不覺醇醪醉人念弟四海無家數甲子於絳縣之老一身多病晡夕景於桑榆之杪台臺乃貺以瓊瑤望其長久極知愛厚之情溫然挾纊深銘比況之意展也勞心敢不加餐自喜或有一得之可期冀

母金玉爾音庶幾半載之室邇臨緘率復統惟鑒涵

與田犀

令萱堂七旬初度古來所稀足下兄弟無故偕能祿逮慈幃悅豫子職脩明且足下求仁義以榮親讀詩書而興孝首闢異端持論騰乎遠邇恢弘聖道立身要其始終推廣德心斯爲錫類克紹周公之達方成孟母之名愛特深夫敦勵語不類於稱觴外具鮮魚貳尾少點賓筵之末惟冀堯存可勝欣荷

與奧村庸禮

初挹光儀深承欵密稟既粹於冲恬力自行夫謙抑佳兒快壻森芝玉於階庭趨走敬共攝威儀於几席祿綦重而能下位既高而不驕足徵性學之淵源具見禮詩之訓習緬懷安石之丰采尙醉公瑾之醇醪忽報賁臨不能走御更叨鼎貺益致頽顏感誠至而思銘愧自深而難喻肅緘申謝尙圖面宣

雜帖

按原本於書散之外別出尺牘今改題雜帖

答陳元贊

弟淺衷薄植無足比數至此亦惟閉門掃迹不爲屑屑往來如何村翁之賢亦未嘗識荆乃叨謬愛涓日寵招雖媿不敢承然台臺屢道其誠又不敢固辭以自外至日卽當趨候惟天雨著屐卽不能耳昨枉顧以急於言旋疎慢殊甚深用爲媿先此奉復諸容晤警不宣

答趙文伯

旅寓此間久忘肉味親翁惠我佳殽又重之以脾肺使荒厨暴富笑笑謝謝親翁客居弟當少伸主人之意今雅贖反出自遠客慚愧無量矣先此奉復尙容面頌

答歐陽某

捧讀翰札知福履增慶欣慰欣慰遠惠素紉壹端松煙肆笏物物精美又如此鄭重何福能堪登拜爲媿耳謝謝若唐山有再見天日之時弟必當遄歸昨聞新歲有二舟到港儻有好消息千祈速速示知感刻不盡目下即預作一棺衰朽之人早晚不可定也近以多病畏風一步不敢輕舉來翰諭以寒氣初侵順時珍膏敢不奉爲蓄蔡力疾把筆不備不莊統容嗣佈